

## АДАБИЁТЛАР РЎЙХАТИ

1. Abdulhamid Mutavalli. Al-Islam va mabadi' nizam al-hukm. – Iskandariya: Mansha't al-Ma'arif (nashr yili ko'rsatimagan)
2. Abdulkarim Zaydon. Al-Madxalu lidirasati ash-shariyati al-islamiya. – Iskandariya: Dar Umar ibn Xattab. 2001
3. Abdulqodir Avda. At-Tashri' al-jinaiy al-islamiy. J.1 Bayrut: Dar at-Turos al-arabiy, 1977
4. Abdulvahob Hallof. As-siyasa ash-shar'iyya. –al-Qohira: Dar al-ansar, 1977.
5. Afifi Muhammad Sadik. Al-A'alaqat ad-duvaliyatu fil islam. Cairo: Maktabat al-Khanji. 1977
6. Ala' al-Din al-Kasani. Bada'i' al-Sana'i' fi Tartib al-Shara'i'. J.9. – Cairo: Matba'a al-Imam. (nashr yili ko'rsatimagan)
7. Ja'far Abdusalom. Qavaid al-alaqat ad-duvaliya fi al-qanun ad-duvaliy va ash-shari'a al-islamiya. – Cairo: Maktaba as-salam al-alamiya, 1981
8. Mustafa Ahmad Zarqo. Al-Madhal al-fihqiy al-Om. J.1. – Damashq: Muassasa ar-risala, 1972.
9. Sharafuddin Husayn ibn Ahmad Sayyog'iy. Ar-ravz an-nazir – Sharh Majmu' al-fiqh al-akbar. J.4. – Toif: Maktaba al-muayyad, 1968.
10. Sulaymon Tamoviy. As-sultot as-salas fi ad-dasatir al-arabiya al-mu'asira fi al-fikr al-islamiy, (nashr yili ko'rsatilmagan).
11. Usmon Juma Zamiriya. Usul al-aloqot ad-duvaliya fi fiqh al-Imam Muhammad ibn Hasan ash-Shayboniy. – Ammon: Dar al-ma'oliy, 1999.
12. Ислом. Энциклопедия: А-Х/3. Хусниддинов тахрири остида. – Т.: “Ўзбекистон миллий энциклопедияси” давлат илмий нашриёти, 2003.
13. Сюкийнен. Л. Р. Мусульманское право. – М.: “Наука”, 1986.
14. <http://islamport.com/w/amm/Web/135/280.htm>
15. [http://www.iosminaret.org/vol-2/issue19/Minarets\\_of\\_illumination.php#heading4](http://www.iosminaret.org/vol-2/issue19/Minarets_of_illumination.php#heading4)
16. [http://www.ukcle.ac.uk/research/projects/Islamic\\_International\\_Law.html](http://www.ukcle.ac.uk/research/projects/Islamic_International_Law.html)



## Жасур НАЖМИДИНОВ\*

Ўзбекистон ҳақаро ислом  
академияси мустақил  
тадқиқотчиси

ЗАМОНАВИЙ МИССИОНЕРЛИК  
УСЛУБЛАРИ ВА АМАЛГА ОШИРИШ  
ВОСИТАЛАРИ

MODERN METHODS OF MISSIONARY AND  
MEANS OF ITS IMPLEMENTATION

МЕТОДЫ И СРЕДСТВА РЕАЛИЗАЦИИ  
СОВРЕМЕННОГО МИССИОНЕРСТВА

**Калит сўзлар:** дин омили, миссионерлик, прозелитизм, Насронийликка мослаштириш, динлараро диалог, контекстуализация, миссионерликнинг классик ҳамда замонавий воситалари.

**Keywords:** Religious factor, Missionary, Proselytism, Interpretatio Christiana, Interreligious dialogue, Contextualization, Classical and modern means of missionary.

**Ключевые слова:** Религиозный фактор, миссионерство, Христианская интерпретация, Межрелигиозный диалог, Контекстуализация, классические и современные способы миссионерской деятельности.

Жамият тараққий этиб борган сари миссионерлик ҳам ўз услуб ва воситаларини такомиллаштириб бормоқда.

Миссионерликни амалга ошириш усуллари деб, ушбу амалиётни самарали равишда амалга ошириш учун, муайян тажриба ва илмий асосга таянган ҳолда ишлаб чиқилган ҳамда тизимлилик характерига эга назарий хатти-ҳаракатлар мажмуасига айтилади.

Миссионерлик фаолиятини амалга ошириш воситалари деганда эса – мавжуд услублар асосида диний даъватни омма орасида кенгроқ тарқатишда ёрдам берадиган, ушбу жараёни

\*Dj.Najmiddinov – Independent Researcher of the International Islamic Academy of Uzbekistan

осонлаштирадиган амалий хатти-ҳаракатлар назарда тутилади.

Тарихнинг турли босқичларида сиёсатчилар, сайёҳлар, савдогарлар, дарвешлар миссионерликнинг асосий субъектлари бўлгани, пиروвардида мазкур миссияни бажаришда улар ўз соҳаларидан фойдаланганлари маълум.

Вақт ўтиши билан миссионерлик услуб ва воситалари ҳам такомиллашиб, бугунги кунда классик усуллар билан бир пайтда, янги, замонавий усул ва воситалар, жумладан, теле, аудио, видео, радио ва компьютер технологияларидан кенг фойдаланилмоқда. Ўрганишлар, миссионерлар тарихий тажриба, илмий-фалсафий ёндашув асосида тизимлашган тарғибот усулларини ишлаб чиққанларини кўрсатмоқда. Айниқса, христианлик дини бу борада катта натижаларга эришган.

Туркиялик тадқиқотчи Севги Алтундал Хаждарига кўра христиан миссионерлари қўллайдиган усулларнинг энг кўзга кўринганлари бу насронийликка мослаштириш, маданий мослашув, контекстуализация ва динлараро диалог ҳисобланади [6: 19].

Насронийликка мослаштириш (*Interpretatio Christiana*) – христиан черкови томонидан аввалги динларга оид маданият элементлари ёки тарихий фактларни христиан дунёқарашига мослаштириш амалиёти [2]. Ушбу атама одатда “бутпараст” халқларнинг диний ва маданий ҳаётига, эътиқодлари ва ғояларига насронийлик шаклини беришни англатади.

Христиан динини ёйиш жараёнида насроний черкови бутпарастлик амалиётларини ўз мақсади йўлида мослаштирди, уларни янги ва ўз нуқтаи назаридан ҳақиқий таркиб билан тўлдирди.

*Interpretatio Christiana*нинг биринчи босқичи христианлик тарихининг биринчи асрларига тўғри келади. Ўша пайтда черков қадимги бутпараст маданий элементларини ўзлаштира бошлаган. Бунда, асосан, диний маросимлар, байрамлар ва рамзларга христиан талқинини сингдиришга алоҳида эътибор қаратилган. Хусусан, V асрдан бошлаб қадимий бутпараст ибодатхоналари ўрнига христиан черковларини қуриш амалиёти кенг қулоч ёзади. VII-VIII асрларда Британия оролларида фаолият юритган Авлиё Беде «Инглиз халқларининг черков тарихи» китобида Папа Григорий I дан қуйидаги иқтибосни келтиради: «Мен бу халқнинг ўз бутларига атаб қурган ибодатхоналари бузилмаслиги керак, деб қарор қилдим. Улардаги бутларни йўқ қилгандан сўнг,

муқаддас сувни олинг ва бу ибодатхоналарга сепинг. Уларга алтарьлар ўрнатинг ва муқаддас буюмларни жойлаштиринг. Агар ибодатхоналар мустаҳкам қурилган бўлса, бутлар хизматини Ҳақиқий Худо хизматига алмаштириш жуда муҳимдир. Одамлар ўзлари муқаддас деб билган жойлар йўқ қилинмаганини кўрсалар, қалбларидан залолатни чиқариб юборадилар ва чинакам Худони таниб, Унга ибодат қилиш учун таниш жойларга кўпроқ келадилар» [8].

Баъзи тадқиқотчилар фикрига кўра христианликдаги Рождество ва Пасха байрамларининг саналари ҳам олдинги динлардан ўзлаштирилган. Хусусан, бугунги кунда аксар христианлар томонидан Рождество байрами нишонланадиган 25 декабрь санаси Қадимги Римда Енгиламас Қуёш худосининг туғилган куни ҳисобланган [1]. XII асрда суриялик епископ Дионисий бар Салиби Исонинг туғилиши байрами бутпарастлар Қуёшнинг пайдо бўлишини 25 декабрда нишонлагани сабабли 6 январдан 25 декабрга кўчирилганини ёзган [1].

Маданий мослашув (инкультурация) – муайян эътиқод ёки тушунчани маҳаллий маданият ичига киритиш, адаптация ҳосил қилишни билдиради [18: 144-155; 14].

Иккинчи Ватикан Кенгашида инкультурация бугунги кундаги энг тўғри миссия усули сифатида таъкидланган. Инкультурация тизимли метод сифатида Иккинчи Ватикан Кенгашида кун тартибига киритилган бўлса-да, у қадимги даврлардан бошланган эди. Павел бу усулни бутпарастлар орасида насронийлик таълимотини тарқатишда қўллаган [4: 27].

Католик черковида инкультурациянинг қабул қилинишида Иезуитлар ордени кучли таъсир кўрсатган. Италиялик иезуит миссионер Роберт де Нобили (1577-1656) ушбу усулни Ҳиндистонда қўллаган ва лотин христианлиги ва хинд маданиятини мослаштиришга уринган. Бу ҳаракати учун де Нобили Рим инквизиция судига ҳукм қилинган.

Иезуитларнинг яна бир вакили Жон Дениелу бирор мамлакатда муваффақият қозониш учун черков ташкил этишнинг ўзи етарли эмаслиги, шу мамлакатнинг маданий жиҳатлари билан бирлашиб, христианликка илҳомлантирувчи маҳаллий асарлар яратиш кераклигини таъкидлаган. Ушбу услубни қўллаш орқали христианлар миссионерларни маҳаллий маданият билан бирлаштиришни мақсад қилдилар, қайсидир маънода улар миссионерлик



Маълумки, замонавий сиёсий, ижтимоий ва ҳағто иқтисодий жараёнларда дин омили муҳим роль ўйнамоқда. Мазкур омилдан ижобий фойдаланиш жамяятнинг маънан ривожланиши, салбий ёки ғаразли маънода ишлатиш таназулга олиб келади.

Таъкидлаш лозимки, замонлар ўтгани сайин миссионерлик услуб ва воситалари ҳам такомиллашиб, бугунги кунда классик усуллар билан бир пайтда, янги, замонавий усул ва воситалар, жумладан, теле, аудио, видео, радио ва компьютер технологияларидан кенг фойдаланилмоқда.

Ушбу мақолада миссионер ташкилотлар ўз тарафдорларини кўпайтириш мақсадида фойдаланилаётган услуб ва воситалар ҳамда уларнинг таҳлилига бағишланган.

It is known that the religious factor plays an essential role in modern political, social, and even economic processes. The positive use of this factor leads to the spiritual development of society. But the use of this factor in a negative or biased sense leads to its decline.

It should be noted that over time, missionary methods and tools have improved. Today, along with classical methods, new, modern methods, and tools, including television, audio, video, radio, and computer technologies, are widely used.

This article discusses and analyzes the methods and tools used by missionary organizations to increase their followers.

Религиозный фактор играет важную роль в современных политических, социальных и даже экономических процессах. Правильное использование этого фактора ведет к духовному развитию общества, использование в негативном или предвзятом смысле ведет к упадку.

Следует отметить, что со временем миссионерские методы и инструменты совершенствовались и сегодня, наряду с классическими, широко используются новые, современные методы и инструменты, включая телевидение, аудио, видео, радио и компьютерные технологии.

В данной статье обсуждаются и анализируются методы и инструменты, используемые миссионерскими организациями для увеличения числа своих последователей.

фаолияти қарши реакцияга учрашининг олдини олишни ҳам хоҳлаган эдилар [4: 28].

Инкультурациянинг ёрқин мисоли сифатида дунёнинг турли мамлакатларида ибодатхоналарнинг қурилиш услуби, диний атамаларнинг маҳаллий халқлар тилига мослаштирилишини келтириш мумкин. Хусусан, Япония, Хитой каби давлатларда христиан черковлари ва мусулмон масжидлари маҳаллий пагодалар услубида қурилиб, бир қарашдан буддавий эҳромларини эслатиб юборади.

Айни дамда, миссионерларнинг маҳаллий халқларга хос бўлган либосларни кийиши, ибодат давомида маҳаллий динларга хос бўлган атамаларни ўзлаштириши (Аллоҳ, Тангри, Худованд, Иблис) ҳам инкультурациянинг ёрқин мисолидир.

Ўзбекистон мисолида олсак, баъзи христиан ташкилотлари томонидан масиҳийликни тарғиб қилишда Алишер Навоий шеърларидаги муайян мисралардан фойдаланишга уриниш ҳолатлари инкультурациянинг бир кўриниши дейиш мумкин.

Масалан: Бир қадах берсанг, кўярмен бутқа юз, эй пири дайр,

Иккисин олиб, бошимға ҳасбатан лиллоҳ, кел.

Гарчи келмай – келмай ўлтурдинг Навоийни валеқ,

Эй Масиҳ, онинг мазори бошиға гоҳ – гоҳ кел [7: 412].

Мазмуни: Эй дайр пири “Тарсолар ибодатхонаси бошлиғи” агар менга бир қадах берсанг бутқа сиғинаман. Сен иккитасини олиб, Оллоҳ учун ёнимга кел. Эй Масиҳ, сен Навоийни ёнига келмай ўлдирдинг, энди унинг мазори бошиға гоҳ – гоҳ кел.

Бу мисраларда бадий тасвир воситаси сифатида “қадах”, “бут”, “пири дайр”, “Масиҳ” сўзлари ишлатилган.

Лаълини севдим, кўзининг қатлидин қай-ғурмоғум,

Не ғам ўлмақдин киши бўлса Масиҳо бирла дўст [7: 74].

Мазмуни: Мен ёрнинг лаълини (лабларини) севдим. Жаллод кўзларининг қатл этишидан қайғурмайман, чунки Масиҳо билан дўст бўлган кишининг ўлмоқдан ғами бўлмайди.

Юқоридаги мисралар “талмеҳ санъати”нинг, яъни жой, тарихий шахслар, пайғамбарлар, авлиёлар номларини ўз фикрини ифода этиши учун бадий тасвир воситаси сифатида ишлатишнинг ёрқин намунаси. Алишер Навоий асарларида шундай руҳда ёзилган ҳамда Исо ва Масиҳ номлари истифода этилган мисраларни кўплаб топиш мумкин.

Талмех шеърий санъати Навоийгача, унинг устозлари ижодида ҳам кўплаб учрайди. Бундан асло улар христиан (насоний) динига эътиқод кўйганлар деган хулоса келиб чиқмайди. Зеро, Алишер Навоий ислом дини ва шариат аҳкомларининг пешвоси ва ҳомийси бўлган. Барча пайғамбарлар қатори Исо Масиҳни ҳам эҳтиром билан тилга олган. Чунки уларнинг номлари ва фаолияти Қуръони каримда қайд этилиб, тегишли баҳо берилган.

Бадий адабиётимизга хос юқоридаги каби нозик жиҳатлардан хабардор бўлган миссионерлар улардан ўз мақсадлари йўлида фойдаланмоқдалар [15: 117].

Инкультурациянинг кўринишларидан яна бири, бу черков кўшиқлари ва илоҳий гимнларни маҳаллий халқ оҳангларига солиб куйлашда намоён бўлади.

*Контекстуализация* – христианликда «Библия»ни кенгроқ тушуниш ва насроний бўлмаганлар томонидан яхшироқ қабул қилишга эришиш учун кенгроқ ижтимоий шароитга мослаштиришни англатади [10: 10-15].

Масалан, «Қадимги Аҳд»нинг Забур китобидаги «Мени ювинг, мен қордан оппоқ бўламан» (50:7) сўзларини тропик минтақада истиқомат қилувчилар учун таржима қилиш жараёнида, улар қорни ҳеч қачон кўрмаганларини инобатга олган ҳолда «Мени ювинг, мен кокоснинг ичидан ҳам оппоқ бўламан», шаклида таржима қилинган.

Шимолда ишлайдиган миссионерлар христианларнинг кундалик ҳаётида энг кўп ўқиладиган «Бизнинг кундалик нонимиз» (Хлеб наш насущный) дуосини «Бизнинг кундалик балиғимиз» шаклида таржима қилганлар. Сабаби, нон чукча ва эскимосларнинг рационларига умуман кирмас экан. Худди шундай, Жануби-Шарқий Осиё мамлакатларида «нон» сўзи ўрнига «таом» ёки «гуруч» сўзлари ишлатилган [10: 15].

Худди шу тарзда, «Библия»ни ўзбек тилига «Инжил» ёки «Муқаддас хушхабар», деб аталиши ёки «Қадимги Аҳд» ва «Янги Аҳд» китобларидан «Тора»ни – Таврот, «Псалтирь»ни – Забур, «Апокалипсис»ни – Вахийнома деб таржима қилиш, пайғамбарлардан «Авель ва Каин»ни – Қобил ва Ҳобил, «Иов»ни – Айюб, «Давид»ни – Довуд шаклида исломий атамалар билан ифода этилиши контекстуализациянинг бир кўринишидир.

*Динлараро диалог* – бу ижтимоий адолат тадбирлари орқали Инжилни етказиш ҳамда Инжил ва маданиятлар ўртасида алоқани таъминлашнинг

ажралмас воситасидир. Бошқача қилиб айтганда, черковнинг жамиятларни Инжилга биноан қайта тиклаш жараёни ҳам маданиятларга кириб бориш жараёни ҳам диалог жараёни ичида амалга ошади. Кўпгина қўлланмалар, хусусан “Доминус Иесус” ва “Редемпториос Миссио” сингари Папаликнинг муҳим қўлланма китобларида черков мулоқот методини замонавий миссионерлик тушунчасининг ажралмас қисми чифатида ошкора ифодалаган [5: 36].

Миссионерлик фаолиятда инсон психикаси билан боғлиқ факторларга алоҳида урғу берилади. Айниқса, сўнги йилларда мазкур омилга эътибор кучайган. Чунончи, психологик жиҳатдан бир шахснинг эътиқодини ўзгартириш жараёни куйидаги 4 босқичда кечади:

**1-Ширин сўзлар ва мақтовларга кўмиб ташлаш.** Бунда потенциал прозелитни эътибор ва муҳаббат билан тўйинтиришга ҳаракат қилинади. Масалан, секта аъзолари уни қаттиқ севишлари, улар учун муҳим экани, у Худонинг назари тушган одамлигини уқтиришга ҳаракат қиладилар.

**2-Танқидий фикрлаш қобилиятингизни сўндириш.** Потенциал прозелит илоҳий неъматлар, руҳий осойишталикка эришиш учун бир қанча машқларни бажариши лозимлигига ишонтарилади. Бир оҳангдаги кўшиқларни куйлаш, медитация охир-оқибат мустақил фикрлашни пассивлаштиради ва буйруқларни сўзсиз бажарадиган роботга айлантиради.

**3-Гуруҳ ичидаги алоқаларни мустаҳкамлаш ва ташқи дунёдан узилишга мажбур қилиш.** Бунда потенциал прозелит фақат гуруҳдошлари ҳақиқий дўст, қолганлар эса жоҳил, адашган деб уқтирилади. Шунингдек секта раҳнамоларининг гапи абсолют ҳақиқат, нажотга етакловчи сўзлар бошқаларнинг сўзлари эса ёлғон экани уқтирилади.

**4-Сектадан ташқаридаги ҳаётга қайтиш имкониятини йўққа чиқариш.** Бу босқичда, янги прозелит сектага буткул боғланиб қолади. Сектадошларидан бошқалар кўзига бегона, душман бўлиб кўринади. Сектадан ташқаридаги ҳаётга бегона назар билан қарайди. Қачондир сектанинг иддаолари сохта эканини ҳис қилганида ҳам ундан чиқишга юраги бетламайди. Ташқи дунё унга дахшат бўлиб кўринади.

Юқорида келтирилган усулларни амалга оширишда бир қатор классик ва замонавий воситалардан фойдаланилади.

**Миссионерликнинг классик воситалари**

**Уйма-уй юриш.** Одамлар билан куннинг долзарб муаммолари ҳақида суҳбатлашиш,



уларнинг дардларига қизиқиш билдириш ва ушбу муаммолардан чиқиш йўллари кўрсатиб беришни таклиф қилиб, ўз ташкилотларига жалб қилиш миссионерликни амалга оширишнинг қадимий воситаларидан ҳисобланади.

Уйма-уй юришдан энг кўп Иегово шоҳидлари оқими аъзолари фойдаланиб, улар бу орқали Исо Масих ўз хаворийларига буюрган амрни бажараётганларини таъкидлайдилар [12]. Хусусан, 2005 йилда Иегово шоҳидларининг бош ташкилоти томонидан уйма-уй юривчи миссионерларнинг кундалик харажатларига 100 миллион долларга яқин маблағ сарфланган [15: 67].

Хайрия ёрдамлари кўрсатиш миссионерликдаги энг қадимий ва самарали воситаларидан бири ҳисобланади.

Зилзила, тошқин, очарчилик каби офатларнинг содир бўлиши миссионерлар учун айни муддао ҳисобланади. Қаерда юқоридагидек ҳолатлар юз берса ўша ерга биринчи бўлиб миссионерлар етиб боришади. Дастлаб улар ўзларини беғараз ёрдам кўрсатаётганларини кўз-кўз қилиб, аста секин асл мақсадларини кўрсатадилар.

Бунга далил сифатида қуйидаги мисолни келтиришимиз мумкин. 2003 йили Қирғизистон бош вазири билан учрашув чоғида, АҚШ нинг ЮТА штати делегацияси раҳбари Рассел Нельсон ўз штатидан Қирғизистонга инсонпарварлик ёрдамининг кўпайтирилиши Қирғизистон ҳудудида Мормон черковининг нечоғлиқ тез қонунийлаштириш билан боғлиқ эканини қайд қилган [11].

Хайрия тадбирлари орқали жамият онгида ижобий имидж яратиш, маҳаллий аҳоли, шунингдек, маҳаллий ҳокимият вакиллари билан дўстона муносабатларни қуриш мақсад қилинади. Масалан, Қозоғистоннинг Қарағанда шаҳрида жойлашган 5 та Баптист ва Меннонит жамоаларидан иборат миссионерлик қўмитаси 1990-1998 йиллар орасида Қозоғистонга 398 та инсонпарварлик ёрдамлари ортилган транспортлар (хар бири 15-20 тонна) юборган. Уларнинг юклари асосан озиқ-овқат маҳсулотлари, кийим-кечак, пойабзал, дори-дармонлардан иборат бўлган. Бундан ташқари 208 та миссионер автомобили, 2818 нусха диний адабиёт, умумий қиймати 4 039 000 немис маркасига тенг ёрдам кўрсатган [15: 41].

Тиббиёт ва таълим соҳаларига махсус кадрларни юбориш (тиббий хизматчи, ўқитувчи-мураббий ва х.к.) ҳам энг қадимий воситалардан биридир.

Маълумки Исо Масихга берилган мўъжизалардан бири инсонларни даволаш хусусияти ҳисобланади. Илк миссионерлар асосан ўша даврларда ҳам анчагина ноёб касб ҳисобланган ва юқори кадрланган табиблик фаолияти билан шуғулланиб, инсонларни даволаш билан бир қаторда динни тарғиб қилар эдилар. Бу ўз даври учун энг самарали усуллардан бири эди.

Ҳозирги кунда бир қатор миссионер жамоалар тиббиёт соҳасидан фойдаланмоқда. Жумладан, маълумотларга кўра Еттинчи кун Адвентистлари дунёнинг турли чекаларида 200 дан ортиқ бепул шифохоналарга эга.

1992 йил 20 июлда миссионер Сергей Рахуба томонидан ташкил этилган “Руҳий тикланиш” миссионерлик ассоциациясининг минтақавий миссионерлик марказларини ривожлантириш концепциясида тиббий миссияларнинг асосий вазифаси: “Янги черковларни тузиш ва инжиллаштириш”, деб белгилангани ҳам бу соҳага бўлган эътиборнинг мақсадини яққол ифодалайди, дейиш мумкин. Ушбу ассоциация томонидан ўтган йилларда МДХ мамлакатларида фаолият олиб борадиган 1000 дан ортиқ миссионернинг “малакаси” оширилгани эса ушбу мақсадга эришиш йўлида олиб борилаётган ишлар кўлаמידан кичик бир нишона, холос [15: 84-85].

Ўрганиш бугунги кунда тиббий соҳа имкониятларидан фойдаланган ҳолда миссионерлик амалиётини ташкил этишда:

- ибодатга келувчиларнинг ахборотларига таянган ҳолда конкрет-адресли ёндашув асосида касалларнинг ҳолидан хабар олиш, уларга дори-дармонларни харид қилишда кўмаклашиш;

- наркоманларни даволаш билан шуғулланиш;

- Халқаро ногиронлар куни муносабати билан қулоғи паст эшитадиган фуқароларга қулоқ учун мўлжалланган овоз кучайтиргич аппаратлари ва ўзи юролмайдиган ногиронлар учун аравачалар харид қилиш ҳамда ногиронлар уйларига турли, жумладан, озиқ-овқат маҳсулотлари шаклида ёрдам кўрсатиш;

- шифохоналарга ҳомийлик қилиш, уларга чойшаблар, ёстиқ жилдлари, тиббий ходимлар кийимлари каби зарур нарсаларни етказиб бериш;

- алкоголик, наркоман ва собиқ маҳбусларни “меҳнат тарбияси» ва “Хушхабар”ни англантиш ва йўли билан “даволаш” ва “соғлом турмуш тарзига қайтариш”;

- иглотерапия ва массаж йўли билан беморларни даволаш каби йўналишларга алоҳида



этибор берилётганини кўрсатади. Бу бежиз эмас, албатта. Зеро, қайд этилган йўналишларнинг ҳар бири этиқодий тарбия объекти сифатида танлаб олинганларга таъсир ўтказишнинг ўзига хос имкониятларини беради.

Умуман олганда, тиббиёт соҳасидан миссионерлик йўлида фойдаланишга интилишнинг бир қатор афзалликлари бор. Гап шундаки, врач бемор билан бевосита, аксарият ҳолларда бегоналарнинг иштирокисиз мулоқот қилиш имкониятига эга. Шу нуқтаи назардан қараганда, бундай шаклда амалга оширилган миссионерлик ташқи кузатув ва назоратдан холи бўлади ҳамда ноқонуний фаолиятнинг фош бўлиш эҳтимолини кескин даражада пасайтиради.

Айни пайтда, бемор одамда ташқи таъсирга мойиллик, ширин ва юпатувчи сўзга, оддий инсоний қўллаб-қувватлашга ташналик кучли бўлади. Бундай маънавий-руҳий ҳолат ҳам этиқодий босим ва тазйиқ ўтказиш учун қулай шароит яратади.

Шу билан бирга, кўпгина ҳолларда врачнинг мунтазам назорати остида даволанишга эҳтиёжнинг мавжуд бўлишини ҳам унутмаслик керак. Бу эса, ўз навбатида, врачга беморни муайян вақт давомида психологик таъсир доирасида ушлаб туриш, миссионерлик тарғиботини босқичма-босқич амалга ошириш имкониятини беради. Беморни даволашнинг муваффақиятли кечиши эса миссионерлик тарғиботининг самарадорлигини оширишга хизмат қилади [15: 85-86].

2002 йили Тожикистоннинг Сўғд вилоятига Жанубий Кореядан хирурглар, терапевтлар ва педиатр врачлар гуруҳи ташриф буюрди. 2003 йил июлида эса худди шундай ташриф билан энди Чкаловск шаҳрига яна саккизта миссионер врачлар келган [21].

Инсоннинг ҳаётда ким бўлиб этишиши ижтимоий қарашлар ва кадриятларни сингдириш, мустаҳкамлашга хизмат қиладиган таълим-тарбия тизимига боғлиқ. Зеро, муайян билимлар таълим жараёнининг ўзида бевосита ва тўғридан-тўғри, илмий асосда ва тизимли тарзда ўзлаштирилади. Таълим тизими босқичлари ўртасидаги ўзаро боғлиқлик туфайли ғоя ва қарашларни сингдиришдаги тадрижийлик таъминланади. Шу билан бирга, таълим жараёнида амалга оширилган тарғибот натижаларини бевосита текшириб кўриш ва уни такомиллаштириб бориш имконияти ҳам мавжуд.

Юқоридаги каби хусусиятлар миссионерларнинг таълим тизимига алоҳида этибор билан қарашини

келтириб чиқармоқда. Адвентистларнинг дунё бўйича 5000 дан ортиқ ўқув марказларига, пятидесятникликнинг энг йирик йўналишларидан бири - “Худо Ассамблеялари” черковлари бир неча коллеж ва Библия мактабларига эгалик қиладигани ҳам айнан шу билан изоҳланади.

Миссионерлар тил ва компьютер ўргатиш марказлари, ҳатто мактаб ёшигача бўлган болалар учун шу йўналишдаги ихтисослашган боғчалар очиш орқали ҳам ёшлар орасида тегишли тарғиботни ташкил этишга ҳаракат қилмоқдалар. Бунда ота-оналарнинг ўз фарзандларини ёшлиқдан бир неча тилга ўргатиш, компьютер саводхонлигини оширишга бўлган интилиши ва ёшларда бундай соҳаларга бўлган қизиқишлардан усталик билан фойдаланишга ҳаракат қилинаётганини кўриш мумкин. Миссионерлар бундай марказлар ва боғчаларда тил ва компьютер ўргатишни яхши йўлга қўйиш, пул тўловларини нисбатан арзон қилишга алоҳида этибор берадилар. Аҳоли ўртасида ўз фаолиятлари ҳақида ижобий тасаввурни шакллантириш эса миссионерликни амалга ошириш учун ниқоб бўлиб хизмат қилади [15: 89-90].

Хусусан, 1985 йил маълумотларига кўра, католик черкови тасарруфидаги 75 минг бошланғич мактабда 21 миллион, 30 мингта ўрта мактабларда 11 миллион ўқувчи, католик коллежлари ва университетларида 2,1 миллион талаба, шунингдек, 6 500 та касалхона, 12 000 та диспансер марказлари, 10 000 та қариялар ва ногиронлар уйлари, 6 200 та болалар уйлари ҳамда 5 800 та болалар боғчалари мавжуд бўлган. Буларга кўшимча равишда, саводхонлик дастурлари, қишлоқ хўжалигини ривожлантириш дастурлари ва нашриётлари йўлга қўйилган эди [3: 36].

Баптистларнинг Халқаро хизмат корпуси (ISC, АҚШ) 1990 йилдан Ўрта Осиёга таълим тизимида ишлаш учун волонтерларни тайёрлаш, “Халқаро очик эшиклар” (Open Doors International) ташкилоти етакчи тайёрлаш, Библияни ўрганиш бўйича қисқа муддатли курслар ташкил этиш, “Ўрта Осиё христиан мактаблари” ассоциацияси бошланғич мактаб ва ёзги таълим лагерлари, “Халқаро христиан лагерлари (Christian Camping International)” уюшмаси эса болалар учун ёзги дам олиш лагерлари ташкил этиш орқали миссионерлик билан шуғуллангани кузатилган.

Қатор миссионерлик марказлари минтақада тил ўргатиш марказлари паноҳида ўз фаолиятини йўлга қўйган. 2000-йилларда “Халқаро таълим



хизмати” (Международная образовательная служба) ташкилотининг инглиз тили, менежмент ва ҳуқуқшунослик каби йўналишлар бўйича миссионер-ўқитувчиларни тайёрлаб, Венгрия, Россия, Хитой ва Марказий Осиё республикаларига юбориш билан фаол шуғуллангани кузатишган [17: 83].

#### **Миссионерликнинг замонавий воситалари**

Маҳаллий тилларда христианликни тарғиб қилувчи адабиётларни чоп қилиш ва тарқатиш. Бунда биринчи навбатда Библия, қолаверса турли ёш, жинс ва ижтимоий категориялар учун мослаштирилган ранг-баранг адабиётлар ишлаб чиқишга алоҳида эътибор қаратилади.

МДХ ҳудудида христиан адабиётларини тарқатиш “Slaviska Missionen” (Швеция), “People International” (Буюк Британия), “Халқаро Библия жамияти (АҚШ, Швеция) каби ташкилотлар орқали амалга оширилмоқда [17: 83].

Кичик ҳажмдаги қўлланмалар жуда ҳам таъсирчан қилиб ёзилади ва одамларнинг эътиборини жалб қилиш учун чиройли суратларга бой бўлади. Уларда динни қабул қилиш очик-ойдин таклиф қилинмайди. Аммо адабиёт охирида қўшимча маълумот олиш учун ташкилот манзили ёки телефони келтириладики, рисолани ўқиган ва диний билими саёз бўлган инсон бу нарсага учизи мумкин. Масалан, Иегово шоҳидлари ташкилоти томонидан тарқатилган китобчаларнинг бирида шундай ёзилган: “Албатта, Иехово Шоҳидларининг бутун таълимотини ушбу кичик китобга қамраб олишнинг иложи йўқ, лекин биз сизга қўшимча маълумотга эга бўлишингиз учун турар жойингизда истиқомат қилувчи Иегованинг Шоҳидларига мурожаат қилишингизни таклиф этамиз” [12].

Ушбу ташкилотнинг “Қўриқчи минораси” журнали ойига икки марта 334 тилда, қарийб 70 миллион тиражда чоп этилади. “Уйғонинглар!” журнали эса 225 тилда, 90 миллиондан ортиқ тиражда нашр этилади [16]. 2006 йилдан “Қўриқчи минораси” журнали ўзбек тилида ҳам чиқарила бошлаган.

Йирик протестант ташкилотларидан яна бири “Еттинчи кун адвентистлари” жамоаси ҳам ўз фаолиятида ушбу воситадан кенг фойдаланиб, бунинг учун дунё бўйлаб 170 дан ортиқ тилда миссионерлик адабиётлари чоп этишга ихтисослаштирилган 50 дан ортиқ нашриётларочилган [13: 38].

Пятидесятникликнинг турли ташкилотлари ҳам ўз даъватчилик фаолиятларида асосан

ушбу воситадан фойдаланадилар. Жумладан, “Худо черкови” ташкилотининг саккизта, “Худо ассамблеялари” черковининг 16, шу жумладан, аёллар ва болалар учун журналлари ва Халқаро бирлашган пятидесятник черковларининг бир неча нашрлари мавжуд [13: 38].

Маълумотларга кўра, 200 дан ортиқ мамлакатда Тўлиқ Инжил христианларига қарашли 120 дан ортиқ Библия жамиятлари фаолият юритади. Ушбу оқимга кирган янги вакилларнинг ярмидан кўпи динни қабул қилишларини христиан адабиётлари таъсири билан боғлашлари эса юқоридаги услубнинг нечоғлиқ самарали эканини кўрсатади [9: 23].

**Медиа соҳаси имкониятларидан фойдаланиш.** Ҳозирги кунда миссионер ташкилотлари томондан тарғибот ишларида аудио, видео ва электрон маҳсулотлар, рўзнома ва ойномалар, теледастурлар, интернетда онлайн ўқув курслари ташкил этиш воситаларидан ҳам кенг фойдаланилмоқда. Жумладан, миссионерлик мазмунидаги аудио материалларни ишлаб чиқариш ва тарқатиш билан шуғулланувчи кўп сонли халқаро агентликлар фаолият юритмоқда. Ушбу йўналишдаги энг йирик ташкилот – Global Recordings бўлиб, у 40 дан ортиқ миллий агентликни бирлаштиради ва ҳозирги кунга келиб 6500 та тил ва лаҳжада маҳсулот ишлаб чиқармоқда [20].

Ҳозирги кунда Европа ва Америка қитъаларида миссионер даъватчилар машҳурлилик борасида шоу-бизнес ва киносаноат юлдузларидан қолишмайдилар. Маълум бўлишича, телевидение орқали даъват қилишдан энг кўп Адвентист ва Тўлиқ инжил христианлари жамоалари фойдаланишади. Еттинчи кун Адвентистлар жамоаси ҳам анъанавий усуллар билан бир пайтда радио, телевидение, интернет каби замонавий усуллардан фойдаланишмоқда ушбу оқим вакиллари томонидан телевидениеда “Хушхабар келтирувчи овоз”, “Бугунги кун учун эътиқод” каби дастурлар узатилади.

МДХ ҳудудида ҳам бир қатор миссионерлик дастурлари эфирга чиқади. Жумладан, 90-йилларда ҳамда 2000-йиллар бошида Россиянинг ТВ-3 канали орқали бутун МДХ га узатиладиган «Кеннет Коупленд миссияси»га қарашли “Иймонли кишининг баралла овози” дастури, бундан ташқари Пятидесятник йўналишига тегишли “CNL”, “ICB” каби телеканаллар, “Кема” миссионерлик ташкилотининг ўрта(MW) ва қисқа (УКВ(SW)) тўлқинларда узатиладиган радио дастурлари мавжуд бўлган [9: 35].



Ҳозирги кунда халқаро христиан радио дастурларини узатишда 13 та энг йирик агентликлар иштирок этимоқда. Улар томонидан 211 тилда ҳафтасига 8,5 минг соат миқдорида эшиттиришлар олиб борилмоқда. Биргина “АНД овози” номли бутунжаҳон радиоси 120 дан ортиқ тилда юздан ортиқ мамлакатга “Инжил”ни тарғиб қилиш билан шуғулланади [13: 37].

Интернет тармоғида ҳам миссионер ташкилотлар ўз саҳифаларига эгалар. Хусусан, интернетдаги [www.calebproject.com](http://www.calebproject.com), [www.10/40.org](http://www.10/40.org) каби сайтларда “10/40 ОЙНА” худудида миссионерлик фаолиятини ташкил этиш тўғрисида кўрсатмалар берилиб, ушбу ҳудуд харитаси ҳам келтирилган. Тожикистондаги миссионерларнинг сайтида ([www.hirte.narod.ru](http://www.hirte.narod.ru)) эса, мусулмонларни протестантликка ўтказиш ҳақида тегишли кўрсатмалар берилган. Ушбу сайтларда миссионерларга турли маслаҳатлар, миссиология бўйича ўқув курслари бериб борилади.

Кино инсон онги ва хулқига таъсир кўрсатишнинг ўзига хос услублари ва имкониятларига эгаллигини кишиларнинг машхур киноқаҳрамонларга тақлид қилишларида, уларнинг хатти-ҳаракатлари, қилиқлари ва, ҳатто, кийинишларини такрорлашга интилишларида кўришимиз мумкин. Киноқаҳрамонлар айтган ва машхур бўлиб кетган сўзлар, иборалар ва гапларни ҳам кинонинг кишилар хулқига таъсирини кўрсатувчи ҳаётий мисоллар сифатида қараш мумкин.

Маълумотларга кўра, масалан, 2006 йилда миссионерлик ғоялари билан суғорилган 118 та кинофильм ишлаб чиқарилган бўлиб, улар Голливудда яратилган барча фильмларнинг 41 фоизини ташкил этади.

Мутахассислар фикрича христианлик руҳи билан суғорилган фильмлар жангари ва фантастик фильмлардан ҳам кўпроқ даромад келтирмоқда.

Бугунги кунга келиб, миссионерларнинг фан тараққиёти ютуқларидан бўлган нейролингвистик дастурлашдан фойдаланган ҳолда “бадий” ва “тарихий” филмлар орқали ўз ғояларини тарғиб қилиш тенденцияси кузатилмоқда. Бунга “Виждон амри” (По соображениям совести), “Тарас Бульба”, “Ной” каби фильмларни мисол қилиб кўрсатишимиз мумкин.

Аксар томошабинлар “Оскар” мукофотини олган “Виждон амри” фильмининг ҳеч қандай диний характерга эга эмас деб фикр юритадилар. Агар диншунослик нуқтаи назаридан қаралса, мазкур фильмнинг бошидан охиригача “Еттинчи кун

адвентистлари”нинг ғоялари тарғиб қилинганлигига гувоҳ бўламиз. Фильмда бош қаҳрамон Десмонд Досс исмли бола уруш йилларида армияда хизмат пайитида ўз диний принципларига кўра давлат томонидан ўрнатилган тартиб қоидаларга қарши чиқади ва қаҳрамон сифатида гавдалантирилади.

Қайд этилган мисоллар яқин истиқболда кино инсон онгига эътиқодий босим ўтказиш ва христианлик ғояларини тарғиб қилишнинг асосий бўғинига айланишидан далолат беради [15: 95].

Юқоридагилар билан бир қаторда миссионерликда мақсадли дастурларни тайёрлаш, аҳоли ва ижтимоий категорияларни танлаб олиш ва индивидуал ишлашга катта урғу берилади. Хусусан, ёшлар билан ишлашда – талабалар ва болалар учун миссиялар, христиан оромгоҳлари шулар жумласидандир.

Ҳозирги кунда Халқаро христиан оромгоҳлари ассоциациясига МДХ нинг 7 мамлакатидан 177 оромгоҳ аъзо бўлган. Оромгоҳларга асосан ота-онаси йўқ ёки кам таъминланган оилалар вакиллари бепул асосда жалб этилади. Дастурлар шундай ишлаб чиқилганки, мавсум охирига бориб ушбу оромгоҳларда дам олган бола христианликни қабул қилади [19].

Миссионерлар маҳаллий кадрлар тайёрлашни муҳим вазифа ҳисоблайдилар. Чунки прозелит-фаоллар хорижлик миссионерларга ошқора фаолият олиб бормаган ҳолда маҳаллий жамоаларни бошқариш, молиявий ва бошқа шаклдаги фойда кўриш имкониятларини яратадилар. Одатда миссионерлар асосий эътиборни аралаш миллат вакиллари билан иборат оилаларнинг аъзолари, илгари ҳеч бир динга эътиқод қилмаган, оғир хасталикка, жудоликка, моддий қийинчиликка дуч келган, ахлоқ тузатиш муассасаларидан чиқиб келган, яъни моддий ва маънавий кўмакка муҳтож кишиларга қаратмоқдалар. Шунингдек, уй бекалари, зиёлилар, ёшлар каби ижтимоий гуруҳлар ҳам миссионерларнинг “нишони” саналади [17: 83].

Хулоса ўрнида шуни айтиш мумкинки, миссионерлар ҳар қандай киши ва жамият ҳаётида учрайдиган ижтимоий-иқтисодий муаммолардан ўзларининг мақсадлари йўлида фойдаланиб қолишга доимий эътибор бериб келганлар. Улар бугунги кунда ҳам моддий-маънавий таъсир ўтказишнинг турли шакллари билан усталик билан фойдаланишга ҳаракат қилмоқдалар.



“Кўзи ожизлар жамияти”, “Меҳрибонлик уйи” каби ташкилотларга хайрия сифатида молиявий кўмак бериш, “Қариялар уйларига” ташкилий ва моддий (озик-овқат олиб бориш, мухтож кексаларни овқатлантириш) шаклида ёрдам беришга интилишлар ортида ҳам айнан қалбларни эгаллаш мақсади ётади.

Умуман олганда, миссионерлар турли хил ижтимоий-маърифий тадбирларни тез-тез ўтказишдан ижтимоий онгда ўз фаолиятлари ҳақида ижобий тасаввурни шакллантириш, ўзаро муносабатлар ўрнатиш ҳамда маҳаллий ҳокимият вакиллари билан алоқаларни яхшилашдек мақсадларни кўзлайдилар.

Бундай тадбирларга аҳолининг турли қатламлари, жумладан, ёшлар кенг этилади. Иштирокчиларга христиан адабиётларини ҳам ўз ичига олган совғалар улашилади, тадбир сўнгида албатта ибодат ва “Библия” ўқиш ҳам бўлади.

Миссионерлик билан шуғулланишга ҳаракат қилаётган айрим диний ташкилотларнинг у ёки бу ўрта мактабга янги ўқув йилига тайёргарлик кўриш учун таъмирлаш материаллари олиб бериш, ибодатга қатнайдиганларнинг бевосита таъмир ишларида қатнашиши шаклида ёрдам беришга ҳаракат қилишлари ортида ҳам ғараз мақсадлар ётишини англаш қийин эмас.

Маълумки, Президентимиз ташаббуси билан ҳар йили I-синфга борадиган болаларга ўқув сумкалари, зарур дарсликлар, дафтар ва ручкалар бепул тақдим этилади. Миссионерлар давлатимиз сиёсатига хос бундай инсонпарварлик ҳаракатига ҳам мослашишга ҳаракат қилмоқдалар. Уларнинг ибодатга келувчиларнинг ахборотларига таяниб, конкрет-адресли ёндашув асосида янги ўқув йили арафасида мухтож оилаларнинг I-синфга борадиган болаларига дафтар, қалам ва бошқа канцелярия моллари, “Меҳрибонлик уйи” тарбияланувчиларига эса, унга қўшимча тарзда болалар кийим-бошлари ва ўйинчоқлар совға қилишга уринаётгани ҳам бунга мисол бўла олади.

Миссионерлар тил ва компьютер ўргатиш марказлари, ҳатто мактаб ёшигача бўлган болалар учун шу йўналишдаги ихтисослашган боғчалар очиш орқали ҳам ёшлар орасида тегишли тарғиботни ташкил этишга ҳаракат қилмоқдалар. Бунда ота-оналарнинг ўз фарзандларини ёшлиқдан бир неча тилга ўргатиш, компьютер саводхонлигини оширишга бўлган интилиши ва ёшларда бундай соҳаларга бўлган қизиқишлардан усталик билан фойдаланишга ҳаракат қилинаётганини кўриш мумкин.

## АДАБИЁТЛАР РЎЙХАТИ

1. Andrew McGowan «How December 25 Became Christmas» (<http://www.bib-arch.org/e-features/christmas.asp>.)
2. Eberlein, Johann Konrad (Munich), “Interpretatio Christiana”, in: Brill’s New Pauly, Antiquity volumes edited by: Hubert Cancik and , Helmuth Schneider, English Edition by: Christine F. Salazar, Classical Tradition volumes edited by: Manfred Landfester, English Edition by: Francis G. Gentry. Consulted online on 13 July 2021 <[http://dx.doi.org/10.1163/1574-9347\\_bnp\\_e1406540](http://dx.doi.org/10.1163/1574-9347_bnp_e1406540)>
3. Erdem Gazi. Misyonerlik ve Misyonerlerin Çalışma Metotları. Ankara, Diyanet İlmî Dergi, 2002. S. 36.
4. Erkan Tasci. Din sosyolojisi açısından misyonerlik ve günümüz islam toplulukları. İstanbul, 2006. 27 s.
5. Gündüz Sinasi ve Aydın Mehmet. Misyonerlik. İstanbul, Kaknüs Yayınları. 2002. 36 s.
6. Sevgi Altundal Hajdari (hızl.), Tarihi Süreç İçerisinde Misyonerlik ve Misyonerlerin Yetim Faaliyetleri, İstanbul: İnsamer, 2016, s.19.
7. А.Навоий. Қора кўзим. -Т., 1988. – Б. 412.
8. Беда Достопочтенный. Церковная история народа англов / Пер.: В. В. Эрлихман. СПб.: Алетея, 2001. Седмица.RU. Церковно-Научный Центр «Православная Энциклопедия». Дата обращения: 13 июля 2021.
9. Верерт В. Янгича дунёқараш бўйича ҳаёт. - Дрезден.:1992. – Б. 23.
10. Ворохобов А.В. Христианское послание и его контекстуализация // Дамаскин. Журнал Нижегородской духовной семинарии. 2019. 4(50). – С. 10-15.
11. Домагальская Н., Торалиева Г. Миссионеры несут в Кыргызстан новую веру и еду. 2005 год. <https://iwpr.net/ru/global-voices/missionery-nesut-v-kyrgyzstan-novuyu-veru-i-edu>
12. Иехованинг Шоҳидлари: улар нимага ишонадилар?, Ташкилот томонидан нашр этилган таркатма варақа. – Гамбург: 2005.
13. Нажмиддинов Ж. Миссионерлик: кеча ва бугун. – Тошкент: “Тошкент ислом университети” нашриёт-матбаа бирлашмаси, 2008. – Б. 41.
14. Овсиенко Ф.Г. Христианская инкультурация как метод сближения культур запада и востока. (<http://www.gazetaprotestant.ru/2011/05/xristianskaya-inkulturaciya-kak-metod-sblizheniya-kultur-zapada-i-voštoka/>). Дата обращения: 13 июля 2021.
15. Очилдиев А., Нажмиддинов Ж. Миссионерлик

моҳият, мақсадлар, оқибатлар ва олдини олиш йўллари. – Т.: Тошкент Ислам университети нашриёти, 2009. –Б. 117.

16. Сторожевая башня (журнал) // Материал из Википедии – свободной энциклопедии. [https://ru.wikipedia.org/wiki/Сторожевая\\_башня\\_\(журнал\)](https://ru.wikipedia.org/wiki/Сторожевая_башня_(журнал))


17. Ў.Хасанбоев. Ўзбекистонда давлат ва дин муносабатлари: диний ташкилотлар, оқимлар, мафкуравий курашнинг долзарб йўналишлари. –Т.: Тошкент ислом университети нашриёт-матбаа бирлашмаси, 2013. - Б. 83.

18. Чирков Н.В. Инкультурация христианства в контексте межкультурного и межрелигиозного диалога Римско-католической церкви. // Религия и культура. 2018. – С. 144-155.

19. <http://www.ccirussia.org/about/index.html> 13.08.2021

20. <https://globalrecordings.net/en/about> 14.07.2021

21. <https://iwpr.net/ru/global-voices/nischeta-v-tadzhikistane-na-ruku-neislamskim-religiozным-organizaciyam> 21.02.2005



**Элёр АЛИМҚУЛОВ\***

*Ўзбекистон ҳақаро ислом академияси,  
таянч докторанти*

**ДИНИЙ-МИСТИК РАМЗЛАРНИ  
ЎРГАНИШДАГИ КОНЦЕПТУАЛ  
ЁНДАШУВЛАР**

**CONCEPTUAL APPROACHES IN THE  
STUDY OF RELIGIOUS-MYSTICAL  
SYMBOLS**

**КОНЦЕПТУАЛЬНЫЕ ПОДХОДЫ  
В ИЗУЧЕНИИ РЕЛИГИОЗНО-  
МИСТИЧЕСКИХ СИМВОЛОВ**

**Калит сўзлар:** символ, рамз, белги, тимсол, аломат, шаффоф, шаффоф бўлмаган рамзлар, ташқи (масодифий-вақтинчалик) ёки ихтиёрий рамзлар, ички ёки тавсифловчи рамзлар, тушиниши (бирон-бир нарсани англаш) рамзлари, рамзлар мажмуи (символизм).

**Keywords:** Symbol, character, sign, emblem, mark, transparent symbols, non-transparent symbols, external (random-temporary) or optional symbols, internal or descriptive symbols, symbols of understanding, a set of symbols (symbolism).

**Ключевые слова:** символ, знак, эмблема, метка, прозрачные, непрозрачные символы, внешние (случайные-временные) или произвольные символы, внутренние или описательные символы, символы познания (постижение чего-либо), набор символов (символика).

“Рамз” ва “рамзлар мажмуи” сўзлари, уларнинг ишлатилиши ва муомалада фойдаланилиши тўғрисида кўплаб соҳа олимлари, хусусан антропологлар, адабиётшунослар, психологлар, санъатшунослар, диншунослар, тарихчилар ва файласуфлар бир-бирига ўхшаш бўлмаган турли таърифларни берганлар. Ўзбек тилининг изоҳли

\*E.Alimkulov – Doctoral student of the International Islamic Academy of Uzbekistan.